




Landjugiprogramm

Juli - September

2024



FKL-Bsuech: DI, 09.07.2024

Ds aujäärleche Feriekinderlager rückt wieder necher! Mir göh d Ching u natürlech o d Leitergruppe id Länk ga bsuechle. Für das traffe mir üs uf di 17:30 bim Klubrum. Chunnsch o mit? De nimmt dr Ändu bis am 07.07. dini Ahmäudig entgäge.

Rencontres: MI-SO, 10.-14.07.2024

Im 5-Jahres-Turnus wärde mir Dütschschwizer zu dä Wäusche ah ihres Rencontres ihglade. A däm Ahlass isch so zimlech aus drbi, wo zu Spiel u Spass ghört. Fätzig isch, dass me sich ds Programm sogar säuber cha zämesteue. Im Chat hesch du scho dr Link zu aune Infos u zum Ahmäudefenster übercho. Du darfsch di auso grad direkt ahmäude u aufäuegi Frage nimmt dr Vorstand entgäge.



Glace schnouse: DI, 16.07.2024

Ä gueti Glace ghört doch eifach zum Summer. Drum göh mir a däm Zistigabä zäme ga Glace schnouse. Bis denn isch de hoffentlech o so richtig Summer. Mir traffe üs uf di 19:30 bim Klubrum u stüre när ds Restaurant Fritzenfluh ah. Ar Nadine darfsch bis am 07.07. dini Ahmäudig düregäh.

Rehbock-Bar: FR, 19.07.2024

Am jäärleche Schnittersuntig ds Kirchberg darf d Rehbock-Bar vor LJ Untere Emme nid fähle. Uf di 21:00 traffe mir üs bim Klubrum u zügle när uf Krichberg. Ahmäude gärn bis am Abä vorhär bir Andrea.

SAC-Hütte: SA & SO, 20. & 21.07.2024

Rucksack packt u d Wanderschueh gsattlet? Idemfau bisch du parat für üsi Wanderig id SAC-Hütte. Üses Ziu isch d Hütte «Cabane des dix» uf knappe 3'000 m.ü.M. D Plätz si bis uf 1 Bett scho usbuechet. We du no wettsch mitcho, de mäud di schnäu winemore bim Bäрни!



Badminton: MI, 24.07.2024

Mitem Schleger chli ga desumepängle. Öppis ih derä Währieg wei mir a däm Mittwochabä ga usprobiere. Stattfinge duet dä Ahlass ds Kehrsatz u mir gseh üs 19:15 grad direkt dert. Ahmäudige darfsch ar Jasmin bis am 22.07. zuespile.



Hostettfest: SA, 27.07.2024


D LJ Köniz-Längenberg steut wieder ds Hostettfest uf d Bei. Mir si natürlech o drbi! Chumm o mit cho feschte & fiire u mäud di bis am Abä vorhär bim Küsu ah. Am 21:00 gseh mir üs bim Klubrum u dert geitme de öppe no eis ga schnappe, bevors heisst: Hostettfest, mir chöme!

Landjugi-Ferie Mallorca: MO-FR, 05.-09.08.2024

Üsi Landjugi-Ferie wärde dr Wahnsinn! Ä cooli u grossi Truppe stüret nämlech für 5 Täg Mallorca ah. Dank em Ballermann söt dr Usgang eigentlech nid ds churz cho. Aber o ä Erkundigstour vo dere schöne Insle ligt sicher drinne. Vor paar wenige Täg hets no 2 Plätzli gha. Vilech bisch ja du grad ä Glückspilz u verwütschisch no eis drvo, aber auefaus si oscho aui Plätz vergäh. Mäud di bi Inträsse bir Julä oder Doris.



Schwizerisch Landjugi-Wettbewerb: SA & SO, 10. & 11.08.2024




Mir wei wieder mau ga zeige, was mir druffe hei! Dr Schwizerisch Landjugi-Wettbewerb im Muotathal isch di perfekt Gläheheit. D Ahmädefrist isch zwar düre, aber faus du no grad ä Gruppe (2 Manne & 2 Froue) a Lager hesch, laht sech vilech no öppis la mache. De darfsch di so schnäu wi mögloch bir Andrea mäude.

Giron Cantonale Givrins: SA, 17.08.2024

Mir hei scho mehrmaus erläbt, dass di Wäutsche eifach wüsse, wie me chiubnet! Das Jahr fingt sogar dr Giron Cantonale statt, dä gits nume au 5 Jahr. Drum gseh mir üs a däm Samstig 17:30 bim Klubrum u rücke när mitem Zäut ungerem Arm us uf Givrins. Bi Tageslicht schlöh mir der üses Lager uf u löhs när la krache! Dini Ahmäudig nimmt d Linda bis am 09.08. entgäge.

Aarebötle: SA, 24.08.2024

D Wasserratte söue i däm Programm nid öppe ds churz cho, drum göh mir no chli ga desumebööttele. Ds schöne Wätter isch bsteut, itz bruchts no di! Mäud di bis am 14.08. bim Ändu. Mir stige de im Boll i ds 10:34-Bähnli ih.



Klettersteig: SO, 25.08.2024

Sobaud mir vom Aarebööttele wieder trochen si, geits ab uf Mülönen. Dert entfuehrt üs dr Bärni ufe Klettersteig. Chumm o mit u zeig di am 07:30 bim Klubrum. Ahmäude darfsch di bis am 18.08. bim Bärni.

Bierbrauerei Feldschlösschen: SA, 31.08.2024

Eigentlech hei mir ja im Juni scho Rheinfelden wöue ahstüre. Aber wüu angeri Lüt äue di glichi Idee hei gha, nähme mir nomau Ahloulf. Schrib dir dä Tag dick ih Kalender ih, dr Küsu brucht nämlech dini Ahmäudig bis am 04.08. Träffpunkt isch de am 16:00 bim Klubrum.

Slow-Up: SO, 01.09.2024



Houptsach es fahrt – das isch ds Motto vo däm Slow-Up-Sunntig. Du bruchsch für dä Usflug irgend es Gfäht ohni Motor: Trottinett, Velo, Longboard, oder o süsch öppis mit Redli. Mir gseh üs 10:30 bim Klubrum u zügale när uf Oberburg. Dert startet de üsi Route. D Andrea fröit sech uf dini Ahmäudig bis am 30.08.



Sunneunergang: DO, 05.09.2024

Bimne schöne Sunneunergang wei mir zäme es Firabebierli gniesse. Dr gnau Ort chunnt no, aber we du am 20:00 bim Klubrum erschinsch, chas nume guet cho. Ds schöne Wätter het d Linda scho bsteut. Faus aber plötzlech mit dr Lieferig öppis söt schief gah, wird dr Ahlass ufe DO, 19.09. verschobe. Ahmäude darfsch di bis am Mittag vom jewilige Tag direkt bir Linda.

Testkino: FR, 06.09.2024

Ds Autokino vom Gerber Utzigen rückt necher! U dass de sicher aus funktioniert, gits a däm Fritigabä ä Testdurchloulf. Bisch o drbi bi däm Testkino, wo so quasi ä Privat-Show isch? Aus wo du muesch wüsse, erfahrsch de via Chat.



Töfftour: SO, 08.09.2024

Ga Töffli fahre si mir ja scho, itz nähme mir no di grosse Maschine füre. Di gnau Route vo dere Töfftour verratet dir dr Küsu no. Es wird aber sicher ä Zwüschehaut gäh, wo aui Nid-Töfffahrer o wiukomme si! Ahmäudige sammlet d Küsu bis am 01.09. u mir gseh üs am 10:00 bim Klubrum.

Autokino mit Gerber Utzigen: MO-SA, 09.-14.09.2024

It's movietime! Wi du ar HV hesch erfahre, dörfe mir bim Autokino vom Gerber ds Utzige mitwürke. Drum bruche mir de ih dere Wuche chli dini Ungerstützig. Aui Infos drzue chöme aber de im Chat.



Znacht ässe: MO, 16.09.2024

Itz isch di Bärehunger gfragt! Im Restaurant Kreuz Schlosswil hei si nämlech es grosses Salatbuffet u öppis Feins vom Grill gits ono. Da chunnsch sicher o mit, oder? De gib bis am 08.09. ar Jasmin Bscheid. Träffpunkt isch am 19:30 direkt bim Kreuz.



Oenztalparty: SA, 21.09.2024

Es isch wieder Zyt für d Oenztalparty. Die isch jedes Jahr so guet, dass du unbedingt muesch drbi si. Gib ar Andrea bis am Abä vorhär Bscheid u zeig di am 21:00 bim Klubrum.

Vorschou

- Oktoberfest Stuttgart: 04.-06.10.2024 → Nadine
- OLMA: 13.10.2024 → Melanie
- HIT: 02. & 03.11.2024
- Volleyballturnier: 10.11.2024
- HV: 07.12.2024
- Skiweekend: 10. - 12.01.2025

Europapark: FR & SA, 27. & 28.09.2024


Wuhu, dr Europapark steit ändlech vor dr Tür! Ds Hotel isch reserviert u itz het sogar o dr Park offe, jeah. Das wär nämlech bi üsem Plan im Frühlig weniger dr Fau gsi. Das isch o grad ä Grund, wiso dä Ahlass scho usbuechet isch. D Jasmin wird dir de aui Infos no la zuecho.

Kontakt

Andrea: 079 104 36 68
Jasmin: 079 618 56 20
Bärni: 076 443 19 57
Nadine: 077 521 73 69
Ändu: 077 459 99 18
Linda: 077 477 23 02
Küsu: 079 924 67 48

Region West:

Melanie: 077 525 06 35



Herbstbummel LJ Frienisberg-Süd: SO, 29.09.2024

O dr Herbst isch nümme wit wäg. Zäme mit dr LJ Frienisberg-Süd göh mir uf Wanderschaft. Wo dass es bi däm Herbstbummu düregeit, säge de grad d Frienisbärger. Aui witere Infos überchunnsch vor Nadine, aber ds Datum chasch dir scho mau merke.